



# Wimbo wa Sakima

Ursula Nafula

Kiswahili

African  
Storybook.org

Sakima aliishi na wazazi wake na  
dada yake wa miaka minne.

Waliishi katika shamba la mtu tajiri.

Nyumba yao ya nyasi ilikuwa  
mwisho wa safu ya miti  
iliyopendeza.





Sakima alipokuwa na umri wa miaka mitatu, aliugua na kupoteza uwezo wa kuona.

Hata hivyo, Sakima alikuwa mvulana mwenye talanta.

Sakima alatenda mambo mengi ambayo wavulana wengine wa umri wake hawakufanya.

Kwa mfano, angeketi na watu wazima na kujadili mambo muhimu.



Wazazi wa Sakima walifanya kazi  
katika nyumba ya yule tajiri.

Waliondoka nyumbani asubuhi na  
mapema na kurudi jioni.

Sakima aliachwa na dadake.



Sakima alipenda kuimba sana  
nyimbo.

Siku moja mamake alimuuliza,  
“Sakima, unajifunza nyimbo hizi  
kutoka wapi?”





Sakima alimjibu, “Nazisikia akilini  
mwangu kisha naziimba.”

Mamake hakumwelewa.



Sakima alipenda kumwimbia dadake  
hasa alipohisi njaa.

Dadake alimsikiliza na kucheza.







“Tafadhali Sakima, imba tena,” dada yake angemsihi.

Sakima angekubali na kuimba mara nyingine.

Jioni moja, wazazi wake waliporudi  
nyumbani, walikuwa kimya sana.

Sakima alijua kwamba lazima  
kulikuwa na jambo mbaya.





“Kuna shida gani, mama, baba?”  
Sakima aliuliza.

Sakima aligundua kwamba mwana  
wa tajiri wao alikuwa amepotea.

Tajiri alihuzunika na kuwa na  
upweke mkubwa.

“Labda atafurahi tena nikimwambia,”  
Sakima aliwaambia wazazi wake.

Wazazi wake walidharau wazo lake.

“Yeye ni tajiri. Wewe ni mvulana  
asiyeona. Unadhani wimbo wako  
utamsaidia?”





Hata hivyo, Sakima hakukata tamaa.


Dada yake vile vile alimpa moyo,  
“Nyimbo za Sakima hunituliza mimi  
nikiwa na njaa. Zitamtuliza tajiri vile  
vile.”




Siku iliyofuata, Sakima alimuuliza  
dadake amwongoze hadi kwenye  
nyumba ya tajiri.

Alisimama chini ya dirisha moja na  
kuanza kuimba wimbo wake  
alioupenda.

Pole pole, kichwa cha tajiri  
kilionekana dirishani.







Wafanyi kazi wote waliacha kazi zao wakamsikiliza Sakima.

Hata hivyo, mwanamme mmoja alisema, “Hakuna aliyefaulu kumtuliza bwana. Je, huyu mvulana asiyeona ataweza kumtuliza?”



Sakima alipomaliza kuimba wimbo wake alianza kuondoka.

Tajiri alitoka nje kwa haraka na kusema, "Tafadhali, imba tena."

Wakati huo huo, watu wawili walikuja wakiwa wamembeba mtu kwenye machela.

Walimkuta mwana wa tajiri akiwa amechapwa na kuachwa kando ya barabara.





Tajiri alifurahi sana kumwona  
mwana wake tena.

Alimzawadi Sakima kwa kumliwaza.

Aliwapeleka mwanawe na Sakima  
hosipitali ili Sakima aweze  
kusaidiwa kuona tena.

# Wimbo wa Sakima

Writer: Ursula Nafula

Illustration: Peris Wachuka

Language: Kiswahili



© African Storybook Initiative, 2015



This work is licensed under a Creative Commons Attribution  
(CC-BY 4.0) Version 4.0 International Licence

Disclaimer: You are free to download, copy, translate or adapt this story and use the illustrations as long as you attribute or credit the original author/s and illustrator/s.

This story is prepared in collaboration with the KICD. Peris Wachuka is a graphics staff member at the KICD and illustrated the story as a practical step towards the partnership with the ASb.

**Saide**   
South African Institute  
for Distance Education

[www.africanstorybook.org](http://www.africanstorybook.org)  
*A Saide Initiative*